

բողջ պատմական Սյունիքը: 1823 թվին նա ներկայացված էր մինբաշի մելիք Պողոսով¹⁹:

Բռնակոթում նստող մահալական մելիքները նույնպիսի հնությամբ սրբազործված իրավունքի վրա էին հիմնում իրենց ժառանգական իշխանական արտոնությունները: Մելիք Թանգյանները իրենց տան հիմնադիր համարում էին Անիում գորավարություն արած ոմն մելիք Ստեփանի, որը տեղափոխվելով այս կողմերը, ստացել է Սարդար տիտղոսը²⁰:

Համենայն դեպս պատկառելի հնություն կարող էին վերագրել իրենց տանը և մելիք Սաֆրազյանները, որոնք 1699 թ. իրենց մոտ էին հավաքել Զանգեզուրի մելիքներին Իսրայել Օրու ծրագրին ծանոթանալու համար: Թեև նրանց տան ներկայացուցիչը չի հիշվում Մոգիլևսկու և Երմոլով 2-ի մահալական մելիքների ցուցակի մեջ, սակայն Անգեղակոթի երբեմնի այս կառավարիչները պետք է որ արդեն XIX դ. առաջ փոխադրված լինեին Սիսիան (Սիսավան-Ղարաքրիխա) որպես տեղական, մասնավոր մելիքներ, քանի որ այնուհետև նրանց այդտեղ ենք գտնում՝ բավական ճաշակով շինած տան մեջ նստած²¹:

Այդ ցուցակի մեջ հիշատակված ոչ մահալական, այլ առանձին գյուղերի կամ գյուղախմբերի մելիքները երկրորդական դեր էին խաղում մահալական կազմակերպության մեջ: Նրանք իրենց ծագումը կապում էին ոչ թե հին ժառանգական իրավունքի, այլ խանի բարյացակամության և շնորհքի հետ: Այսպես՝ Տաթևի մահալի Գորիս գյուղում կառավարող մելիք Հարությունը Հուսեյինյանների ցեղից էր, որը ըստ ընդհանրական ավանդության առաջացել է խոջա (առևտրական) կալայից: Այս կալայի թոռին՝ Օհանին գորիսեցիք Ղարաբաղի Փանահ-խանի համաձայնությամբ նստեցրել էին իրենց և հարևան գյուղերում մելիք²²: Նույնպիսի նորագույն ծագում է վերագրվում նույն մահալի Խնձորեակ գյուղում 1823 թ. կառավարող մելիք Հուսեյին-Ալիին: Այս կարգի մելիքներից կային և թուրքերի մեջ: Օրինակ՝ Գեղի գյուղում նստած էր մելիք Ալլահ-Ղուլին, որն իր գյուղացիների հետ 1823 թ. նոր էր Ղարաբաղի Աբուլ-Ֆետ-խանի մոտից փոխադրվել Չավնդուր գետի ձախ ափը և բնակություն հաստատել Բաղաբուրտ մահալում: Թուրքական բնակչության մեջ մելիքական պաշտոնի առաջ գալը կարող է նկատվել որպես մեկն այն երևույթներից, որոնք ցույց են տալիս հաբեան հայերի և առհասարակ տեղական հին կուլտուրական էթնիկ շերտի արդեն լայն ծավալ ստացած ազդեցությունն ասիական միջնաշխարհից շատ ուշ ներթափանցած նոր էթնիկ շերտի վրա:

Էնդեմիկ և նորամուտ էթնիկ տարրերի վեցդարյան համակեցությունը խոշոր փոփոխություններ էր առաջացրել թե մեկի և թե մյուսի և՛ տնտեսա-

¹⁹ Այս տան վերջին ներկայացուցիչ խուզարաշխի-բեկին մեր 1931 թ. գիտարշավը գտավ Տաթևում արդեն մերձիմաս վիճակի մեջ: Նա ծնվել է 1819 թ. ուրեմն արդեն 112 տարեկան էր: Նա մելիք Մանուչարի որդին էր: Մելիք Մանուչարը հաջորդել էր իր հայր մելիք Օսեփին, որին իշխանությունն անցել էր իր հայր Մուսայից, անժառանգ մեռած մելիք Պողոսի եղբորից (կենդանի էր Մոգիլևսկու և Երմոլով 2-րդի այցելության ժամանակ): Խուզարաշխի-բեկի ասելով՝ Մանուչարը գրելիս է եղել իր ժամանակի Տաթևի անց ու դարձը և պահում էր իր մոտ Դավիթ-բեկի մասին մի ձեռագիր պատմություն, որը խուզարաշխի-բեկի մոտից խուզարկության միջոցին տարել է Բախշի Ղարաղլաղեցին:

²⁰ Կալայեան Ե., Սիսիան, էջ 16—19:

²¹ Այս տոհմից Զիֆիդար-բեկ Արշակ-բեկ մելիք-Թանգյանի հետ 1905 թ. սպանվել է Եռաբուր (Ուշթափալարի) դաշտում թուրքերի ձեռքով, որոնք պատահելով նրանց՝ վրեժխնդիր էին եղել իրենց մոտից բռնակոթցի հայ գյուղացիների թշած ուշխարների համար:

²² Կալայեան Ե., Զանգեզուր, էջ 8—14: